

Namminersorlutik Oqartussat Kalaallit Nunaata eqqaani aningaasaqarnermut killeqarfimmi immikkoortumi imartap avatangiisinik innarlitsaaliuinissamut inatsimmut ilaalernissaata Inatsisartut aalajangiiffigisassaatus siunnersuut.

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Saqqummiussineq

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

Siullermeenera

Nuannaarutigegalugu Naalakkersuisut sinnerlugit inatsisissatut siunnersuut manna saqqummiuppara. Siunnersuut Naalagaaffimmi oqartussaasut Kalaallit Nunaata eqqaani aningaasaqarnermut killeqarfimmi immikkoortumi imartap avatangiisinik innarlitsaaliuinissamut inatsimmut ilaalernissaanut Inatsisartut akuersinissaannik qinnuteqarnerannut tunngasuuvoq.

Aamma naalagaaffimmi oqartussaasut inatsisissatut siunnersuutaanni allassimavoq, inatsisissatut siunnersuutip atuutilernerani aalajangersakkamik katersuuffiusumik, issittup imartaani heavy fuel oil-imik (HFO-mik) atuinissamut assartuussinissamullu inerteqquteqarnermut tunngassutilimmik nalunaarusiornissap qulakkeerneqarnissaanut siunertaqarfiusumik suliaqartoqarnissaa anguniarneqartoq. Danskít Avatangiisinut Ministereqarfiannit ilisimatitsissutigineqarpoq, nalunaarutip nunani tamalaani inatsisit Kalaallit Nunaanni atuutsinneqartut naapertorlugit, aammalu kalaallit oqartussaasui attuumassuteqartut qanittumik suleqatigalugit suliarineqarnissaa naatsorsuutigineqartoq.

Naalagaaffimmit oqartussaasut inatsisissatut siunnersuutaat MARPOL-imut isumaqatigiisummi Ilangussaq VI-mi Kalaallit Nunaata nunap immikkoortuatut tunuarsimaarfigineqarnerata atorunnaarsinneqarneranut, 2021-mi Inatsisartut ukiakkut ataatsimiinneranni akuerineqartumut atasutut isigineqassaaq. Taamaattumik MARPOL-imut isumaqatigiisummi Ilangussaq VI-mi maleruagassat inatsimmut ilanngunneqassapput. Tamatumunnga peqatigitillugu Naalakkersuisut nalunaarummik, imartamut maleruagassiuiffiusumik suliaqarput, kiisalu danskít inatsisissatut siunnersuutaat atorlugu aningaasaqarnermut killeqarfik immikkoortoq maleruagassiuunneqarluni. Naalagaaffimmi oqartussaasut inatsisissatut siunnersuutaata aamma Naalakkersuisut inatsisissatut siunnersuutaata suliarineqarnerinut atatillugu danskít kalaallillu oqartussaasuisa akornanni qanittumik oqaloqatigiittoqarpoq. Oqaloqatigiinnerup inernerisaanik inatsisissatut siunnersuutit marluusut taakku sapinngisamik pitsaanerpaamik ataqatigiissinneqarput.

Siunnersuutip matuma akuerineqarneratigut kalaallit aningaasaqarnermut killeqarfianni immikkoortumi imartami avatangiisinut maleruagassat nutarterneqarnissaat qulakkeerneqassaaq.

Taamatut oqaaseqarlunga siunnersuut Inatsisartuni kajumittumik suliassanngorlugu tunniuppara.